

MAA BAFORLLÁ  
**FUAÍN, LARÁI AR DAÁDÁI**





# Laráir ar dádaíyózzóriá fuaindór uore asór

Becabící féimli ar fuaindór uore laráir asór fore ar dáí zagoi fórer. Bazumottó decottú baáre neli zagoi fóré ziyanottú bóut bosór lage Norway aíte. Femli ókkól nizor decót óo refuji óiza, ar lagatar lorálori, ocantir ar be-mahafúz zindigi gorá fore. Bóut fuaindé toklifor ar mockil ziníc ókkól lot faiyé. Dadaí, nizor fémlittú ar nizor hefazot gorédé manúiccottú duré zaayó fuaindóllá becí mockil óo.

Fémliwá ehón ekkán caántir decót ailéó aagor dukkún fóorái nózaibó. Janor faná saiboillá aiccé, lékín tará nozánédé ki óibó, hétollá tarállá becí mockil óo. Hítara ki Norwayt taí faríbo ne? Hitarállá ki ekkán noya ar gom zindigir acá asé ne? E habossánót larai ar dadáir loi fuaindór ki taluk acé ar fuaindóré ki asór górebó hiinór baabote forí faribá.

## Fuaindé añará buzidé héttuñaró becí kíyál goré

Fuaindé tarár ate hañsé ódde hinór asólé hodún bozí faré? Añará boro ókkóllóllá fuaindé hodún buzé hin zana becí mockil. Ebbe cóçó fuaindé úddá tarár ate hañse óddé ar hoódde hiin rejisthar goré. Boro fuaindé óitfare nizámmárí táké, hétolla añará buzí nofarí tará ki sinta goré tará ate hañsé óddé hínór baabote.

Kessú thaimot boro ókkólé laráir hótá, polisor acanok hámla, yá decór baaré defeçáiyédé hiínór hótarar baabote fúné. Oinno thaimot fuaindé nizeó dorade ziníc ókkólór loot faiyé – ar noóilé tarár maa baf ar fémlir manúicor uore óiyédé hinózzoria hītaráttú ekkán dor táké. Boc zendilla óibó óok, doror hálót, doror tojruba ar noóilé ferecanir hóbór demakot lagi táké ar nizor bütóré ekkán dor ar ferecani óo.

Dái zágoi fóréde fuaindór tin daból mockil ar sótma óo:

- Hítará bóut duk faitáke nizor decót ar dáibáiccot.
- Hítará egaza sótma ar ocantit asédé maa bafor fuñati také.
- Fuaindolláyó faná saiyédé éçiyar zindegir hálót larait óiyédé hínoóttwaro becí doñr mockilor hotá.



## Fuaindór uore asór

Fuaindé hotá hoi nofailléyo, dhoilla bodhoilla torikaloi tará sinta goréddé hiin 'hoó". Icára gorí ar noóilé gaar losorá gorí itarár ferecani añararé 'hoibár" kucíc goré. Ze fuaindé dor ar sótma faa, hé fuaindór yiin kessú aam lorasora.

- **Gúmór mockil.** Fuaindé hóraf kúab déké noóilé guñça rait gúm zai nofaré. Hítarattú ada raítta gúm bañgi zagói yátu hítarare bisanot raíle hañdibo. Boótzone bisanot no zaa.
- **Demakor biaram.** Fuaindé háná noháibó, oolibó, háná hom háibó noóilé becí hái fetoth dupfaibó. Gaar bót zagat sissiaibó.
- Ferecani. Fuain ferecanit taáibó. Itará egaza hañdibó. Itará kélaitó nosaibó ar be-rokbot tákibó.
- Eskulor kúantí. Dhíyán gorí nofaribó ar ocantit tákibó. Fuain ókkól nizám notáké ar ate hañsér ziníc bañgi felé.
- Gáañrai. Mara mari, mairfit, oinno fuainloi ar boro ókkólloi hoijja góré. Becí híssa fuaindé dorade hetolla yin goré.
- Dor ar cinta. Fuaindé abasoré ar yuníform ólá manúiccóré ar ze ciz ya manúic tararé dukkor hotá monot goraíde itararé dora. Oinno fuain ókkól ferecan óo ar kélaitó nosaa.
- Kessú fuaindór hotá buzítí mockil óo ar túta.

Íln beggún fuain zinóttú zindigit mazé mockil óiyé itarár lorasora. Bar bár doror mamla, bar bár dádaí góra fuaindóllá ohéfázotí banai. Héndilla óhéfázotor zoriya fuaindóttú dor óo. Itará maa bafóttú duré zagói fóribó bólf dora, abáro duk faibo boli dora.



Doñr fuaindé fool óizáibó bólf dora ar itará ki sinta gorér oinno kióré hoitó nosaa. Añará boro ókkólor zimma, itaráré zanaidon. Aage problem óiyéde hètolla endilla óiyédé, ar yíin asté asté gom óizaibó. Zodi gom nooilé honó ekzonor modot luaforibó. Mesál sehétor naas, daktor, demakor mahér, nooilé mastor.

## Guñça fémiliré asór góré

Fuaindór endilla lorasora maa bafollá soñlá óránór ham. Maa baf asanissáte fuaindór uore guccá óo, háas góri ze maa baf nizéó hóran óiye ar dorot mazé asé. Guzora guzori goillé fuaindé aró becí bezar oibó ar ohéfázót sinta gorírbó. Oinno maa baf zin endilla halotot asé itarállói hotá hon zoruri. Ze fuain ókkól decóttú dai aafóizé itará tararé ador goittóde manúic ókkóloré monot goré ar ze zagaa itaráttú kuwaic lagitú híinór baabote hotá húwa mockil. Añará maa baf ókkóllayó dukkor ziníc monot gorá mockil, ar añarályó nizer fuaindóré keengóri cantí diyúm hiin zana becí mockil. Añará maa baf saidé fuaindór honó nuksan no gorá. Fuain aró becí ferecan óibó bóli dore añrá dukkór hotá nohoói.

Kessú maa baf dorai nize nize hañda cúru góre, lékin itará fuaindóré bordac goré ar tararé hoóde iín hitárar kosurí noó, maa noóilé bafe dada ar dadallá ar górolla feth furer boli hoo. Borogún óo mojbur óizái zehón fuaindór duk deké. Añará bechíssa thaimot hoidé “hiñór baabote cinta nogorís- kélla”, · hiñor baabote hotá nohois – eskulor ham goró”, “ hoorot fecák nogorís – tui boro óiyóoss ehón·, “ tor báiyóre no maris – tui ducto”. Lékin fuaindé ferecan ar hálíka búzé zodi tará kióllói hotá hoi noo faillé itará sinta gorédé hiñor baabote. Fuaindóttú itarar sinta oinno zonoré buzón zoruri.

## Fuaindóttú ki laibó

- Maa bafóttú ar dhákor maincóttú fuaindór gaar ar demakor modot gorá ar kíyál ráka foribó.
- Fuaindólla sobór ar becí kíyálor zorurot.
- Fuaindóre buzái hoó foribó tará ki gorí faribó ar ki gorí nofaribó, saaña nogoribá. Itaráré rukó zodi itará hamla goré noóilé ziníc bañga súra goille, lékin itaráré no maizzo ar sindá no maizzo.
- Fuaindóre mazé mazé itarár ate hañsé óddé hiñor baabote buzá foribó.
- Fuaindóttú niyom laibó. Fuain eskulot nozailéó ar maa baf ham no goilléó, gúmóttú sóhí thaimot uçá, hañná ha ar zendila nizor decót goizzil hendilla gorá zoruri.
- Fuaindóttú taarif laibó. Tin bosórór fuaindoreyó kessú cúñçó cuñçó ham diya zaibó. Honó ekzonóttú itaráré hiñ zuroride hiíyaan buzai diya foribó.
- Fuaindóttú boro ókkólór modotor zorurot itarallá kéla ar oinno lorsorar ziníc tuai dibollá. Boró ókkolé zodi fuñati zai faille gom óibó fuaindé héfázot taibollá. Kéla loi fuaindé dukkór sintaré fúrai félar kucíc goré.
- Fuaindé tarár ferecani, tará zin maásusgoré, tará zin sinta goré hiñor baabote hotá hoilé fúinnó. Ferecani cíyar gorá ar hotá hówa zoruri.



- Fuaindé añkitó sailé añkitó doo. Ar añikkédé sóbi hiin ekku fúañti soo.
- Fuaindóré kissá hoitó ar gaan gaitó doo. Boro fuaindé nizor sinta, tarík ar hotá loí dhaíri lekí fare.
- Fuaindoré tuñi goréddé hiín gom ar tuñi fosónd goródé híyan dahó.
- Fuaindoré numaz foraddó ar maa bafor fúañti dormiyó maháfilot corík goró.
- Fuaindóttú héfazót biccác gorí farédé boró manúc ókkól laibó. Maa bafottú fuaindóré sóñlár kaabeliyot homi zailé fuaindór gaar haalot toraturi hóraf oizái. Hétolla dekbal gorouyattú hítarar gaar ar demakor sehétór sasita gora foríbo ar hítarattú zorurot oilé tuade modot hin díba.
- Gom acaá diyar kucíc goró. Zetúkkún maa baf gom acaá díbá, canti, héfazot ar fuaindór zorurotor kial rakíbá, hetúkkún fuainde bálá gorí taí faribó. Monot raikkódé, honó maa baf náidé, ziné hámicá fuaindór zozuroteré bálá górí fura gorí faredé, lékín fuaindóré fura dinot zín lage hiín fura goríbóllá ekkán moksót tákoon zoruri.

Toyari goróiyá  
Zulúm, Sótma óla sab ar húdkúçittu basar baabte  
Wasael or Senthar  
Mazór Elaka, 2023

Telifún: 72 82 20 05  
Taaluk: rvts@stolav.no



[www.rvts.no](http://www.rvts.no)